

醫家
秘本

傷寒論大全

上海千頃堂書局發行

傷寒六書卷三

餘杭節菴陶華述

傷寒明理續論

傷寒三陰三陽脉證論

傷寒汗下溫之法最不可輕據脉以驗證問證而對脉太陽者陽證之表也陽明者陽證之裏也少陽者三陽三陰之間太陰少陰厥陰又居於裏總謂之陰證也發于外則太陽為之首發于內則少陰為之先太陽惡寒而少陰亦惡寒但太陽之脉多浮少陰之脉沉細與其他證狀亦自異也發熱惡寒身體疼痛或自汗或無汗是為表證可汗不惡寒反惡熱口燥咽乾壯熱腹滿小便如常而大便秘結是為裏證可下厥冷囊拳自利煩燥而無身熱頭痛是為陰證可溫浮洪緊數此表病之脉沉實滑數此裏病之脉微細緩若此陰病之脉在表者邪傳于榮衛之間在裏者邪入於胃腑之內胃腑之下少陽居焉若傳之陰則為邪氣入臟矣榮與衛俱為表也亦均可汗也然有汗者為傷風風傷衛氣則以桂枝助陽而汗之輕

無汗者為傷寒寒傷榮氣則以麻黃湯助陽而汗之重榮衛固為表也胃腑亦可以為表也然以腑臟而分表裏則在腑為之表在臟為之裏胃取諸腑可以表言若合榮衛腑臟而分之則表者榮衛之所行裏者胃腑之所主而臟則又深于裏者矣審脉問證辯明定經真知其為表邪則汗之真知其為裏邪則下之真知其為陰證則溫之表有邪則為陽虛陰經受邪則為臟病而溫裏之藥熱如此而汗如彼而下又如彼而溫桂枝承氣投之不差姜附理中發而必中大抵治傷寒有法投劑少差死生立見古人處方立論曰可汗曰可下曰可溫曰和解曰少與曰急下與夫先溫其裏乃發其表先解其表乃攻其裏謂知奇者若網在綱有條不紊論至於此則知古人之立論甚嚴而汗下溫之法亦不可輕也信矣經曰傷寒六七日目中不了了無表證脉雖浮亦有可下者少陰病二三日無裏證亦有可汗者陰證四逆法當用溫而四逆散性寒豈可用哉曰醫在九流之中非圓機之士不足為語也脉雖浮而亦可下者無表證謂六七日不大便借使大便不難其敢輕下之乎少陰病亦有發汗者少陰本無熱反發

熱而表猶未解故用溫藥微取其汗也借使身不發熱其敢輕汗之乎四逆湯用姜附四逆散用枳柴一寒一熱病主四逆固不侔矣然傳經之邪與陰經受邪初病便厥者不同四逆散用藥寒主先陽後陰也四逆湯用藥熱主陽不足而陰有餘也若張氏之論日數多則曰日數雖多但有表證而脉浮者猶可發汗日數雖少若有裏證而脉沉實者卽須下之此日數之不可拘也至如陽極發厥陰極發燥陰證似陽陽證似陰差之毫釐繆以千里可不深思而熟慮也哉

陰陽虛實用藥寒溫辯

傷寒一書所謂陰陽虛盛則精微之義不無辯析於其間四十八難曰病之虛實出者為虛入者為實蓋表之真陽既虛故陰邪以盛出而乘陽是以脉浮于外其病在表法當汗之當其陰邪出表脉浮于外之時不可自感以為陽脉盛也裏之真陰既虛故陽邪以盛入而乘陰是以脉入於內其病在裏法當下之當其陽邪入裏脉實于內之時不可自感以為陰脉盛也是說非古人之立言也蓋使人知如此之為陰盛則抑陰而助陽如

彼之為陽盛則抑陽而助陰陰甚則邪出於外者發表之藥當性溫以助陽氣如桂枝湯之類是也陽盛則邪入于內者攻裏之藥當性寒以抑陽氣如承氣湯之類是也或曰陰出而乘于外是陽之不足也陽病則當有以發表而汗之何哉是大不然陰邪傳于外不汗之則邪何由而去桂枝之性溫溫之乃所以助陽陽有所助而長則陰邪之所由以消辛甘發散為陽者此也張氏所謂承氣入胃陰盛乃亡者正恐陰盛出外而誤以承氣下之安得而不亡或者有陽入而承于內是陰之不足也陰病則當有以溫養而下之何哉是又不然陽邪入于內不下之則邪從何而出承氣之性寒寒之乃所以抑陽陽受其抑則微而真陰之所由以長酸苦湧泄為陰者此也張氏所謂桂枝下咽陽盛則斃正恐陽盛入內而誤以桂枝汗之又安得而不死觀古人發表之藥多溫攻裏之藥多寒則知陰陽虛實之意微非止於汗下設矣所以為用藥寒溫設也

六經用藥格法

太陽屬膀胱寒水非發汗不能愈亦有桂枝麻黃以助陽祛邪此膀胱寒

水之經有標本之作風寒初客仍在表宜用辛溫之劑以發散之若無頭痛惡寒或非冬時皆不可用

陽明屬胃非通泄不能痊必用大黃芒硝以疎利陽熱此言表證已罷頭痛惡寒已除則熱歸陽明之本矣宜承氣湯寒劑以泄熱若惡寒未除則為表寒邪尚在不可下也冬時亦宜用不可拘忌

少陽屬膽無出入之道柴胡半夏能利能汗消解血熱黃芩佐之

太陰脾土惟惡寒濕非乾姜白朮不能燥濕也

少陰腎水惟惡寒燥非附子不能溫潤

厥陰肝木藏血榮筋非芍藥甘草不能滋養此用藥經常之道也

陰陽虛盛用藥寒溫辯

夫傷寒發表攻裏之藥寒熱殊途用之一差死生反掌所以越人仲景深致意於其間也難經云傷寒陽虛陰盛汗之則愈下之則死陽盛陰虛汗之則死下之則愈且寒邪之傷人也有淺深焉淺者汗之深者下之此古今不易之定法也方其風寒初客皮毛之間陰氣乃盛閉塞腠理身中陽

氣已虛不能禦衛遂有惡風惡寒之證見焉當此之時止宜桂枝湯辛甘溫之藥助陽抑陰而發之陰邪既散表氣沖和而愈經云辛甘發散為陽者是也不知用此而反以承氣湯苦寒之藥下之表裏俱傷不忘何待表邪既罷寒作為熱陽陷入深而盛於裏則津液消耗腸胃燥澀而臟腑之真陰虛矣陰氣既虛即譫妄狂燥煩渴惡熱之病而作也當此之時宜用承氣湯苦寒之劑扶陰抑陽而泄去熱氣陽邪即退胃中真陰來復裏氣和平而愈內經所謂酸苦湧泄為陰者是也不知用此乃以桂枝辛熱之藥助邪伐正安有不斃者乎所以仲景云桂枝下咽陽盛則斃承氣入胃陰盛乃亡良以此夫嗚呼此論誠為傷寒汗下之樞機乎俗醫不能達此為妙昧于陰陽虛盛之道悖逆此理而不殺人也幾希經云發表不遠熱攻裏不遠寒豈虛語哉

三陰三陽脉證

經云尺寸俱浮大者陽受病也當一二日發以其脉上連風府故頭項痛腰脊強傷寒則發熱惡寒傷風則鼻塞惡風然傷風有汗傷寒無汗

尺寸俱長者陽明受病也當二三日發以其脉夾鼻絡于目故身熱目疼鼻乾不得卧又曰不惡寒而作渴皆為在經不惡寒反惡熱自汗出大便難尺寸俱弦者少陽受病也當三四日發以其脉循脇絡於耳故胸脇痛而耳聾口苦咽乾目眩往來寒熱而嘔此三經受病未入於腑者可汗而已尺寸俱沉細者太陰受病也當四五日發以其脉布胃中絡于嗑故腹滿而咽乾或腹痛手足溫自利不渴

尺寸俱沉者少陰受病也當五六日發以其脉貫腎絡于肺繫舌本故口燥舌乾而渴惡寒口中和默默欲寐時時腹痛又咽痛三證

尺寸俱微緩者厥陰受病也當六七日發以其脉循陰器絡于肝故煩滿而囊縮唇青舌捲筋急或渴不欲食即吐衄此三經皆受病也已入於腑者可下而已此皆自陽經傳來者故宜下而去之非若陰經自中之寒此則為真陰證矣當用四逆湯輩溫之

汗下溫正法

太陽傷風自汗惡風桂枝湯傷寒無汗惡寒麻黃湯陽明不惡寒反惡熱

自汗者大便難大柴胡湯小承氣湯汗不止者胃汁乾急下之大承氣湯
無汗惡寒升麻葛根湯有汗脉遲微惡寒為表未解桂枝湯無汗脉浮而
喘麻黃湯

少陽證病屬小柴胡湯

太陰自利不渴為臟寒理中湯四逆湯胸中脹滿枳實理中丸脹滿脉浮
桂枝湯脹滿時痛桂枝加芍藥湯痛甚桂枝加大黃湯

少陰脉沉口不乾舌不燥皆惡寒小便清白四逆湯始得病脉沉反發
熱麻黃附子細辛湯口燥咽乾而渴急下之大承氣湯六經中惟此一經
難治大要以口燥而渴知其熱脉沉而遲別其寒

厥陰脉微浮為欲愈不浮為未愈小建中湯脉浮緩如瘧狀桂枝麻黃各
半湯脉沉短者囊必縮為毒氣入臟承氣湯下之利不止者四逆湯

傷風見寒傷寒見風脉證

熱盛而煩手足自溫脉浮而緊此傷風見寒脉也不煩少熱四逆
浮而緩此傷寒見風脉也

二者為榮衛俱病法用大青龍湯然不可輕用須風寒俱盛又加煩燥方可與之

一法以桂枝麻黃湯尤穩今改羌活湯

三陽合病

本太陽病若汗若下若利小便無津液胃中燥轉屬陽明是為脾約若惡寒用升麻葛根不惡寒反惡熱大便難白虎湯譫語者調胃承氣湯下之喘而胸滿者不可下麻黃湯少陽頭項強急脇下硬滿目眩往來寒熱小柴胡湯

少陽陽明本少陽病因為發汗利小便後胃中燥大便難屬調胃承氣湯正陽陽明乃本經風盛氣實也大柴胡湯大小承氣湯選用之

三陽合病腹滿身重譫語遺尿口中不仁屬白虎湯口乾舌燥不仁背惡寒同太陽陽明少陽陽明正陽陽明無表證者俱可下惟惡寒者為太陽陽明合病未過經為屬表可發汗桂枝麻黃各半湯蓋在經則汗過經則下也

太陽陽明併病

本太陽病發汗則汗出不徹因轉出陽明續自微汗出不惡寒是併歸陽明也

太陽證尚在桂枝麻黃各半湯太陽證也大小承氣湯陽明證也

春溫變熱

溫熱病者冬時感寒偶不即發寒毒藏於肌膚至春變為溫病夏變為暑病暑病者熱又甚於溫也溫病發于春三月夏至前是也發熱咳嗽頭疼身痛口燥渴脉浮弦熱甚者小柴胡湯熱微者升麻葛根湯解肌湯微熱不渴小柴胡加桂枝渴者加五味渴者去半夏加括簍人參脉實煩渴者大柴胡湯微利之以其脉實必大便難也虛煩者竹葉石膏湯然用羌活湯解之為當渴加知母石膏

夏月熱病發熱頭痛身體痛重不惡寒而惡熱其脉洪不可溫宜羌活湯渴加知母石膏三月至夏謂之晚發施子升麻湯有少陽證者小柴胡湯更于前方內選用若春夏有惡風惡寒類傷寒證者蓋當時暴中風寒之氣新病即非冬時受寒通用羌活湯治之

症

症者先太陽中風重感寒溫所致經曰身熱足寒頸項強急惡寒時時頭熱面赤目赤獨頭面搖卒口噤背反張者症病也桂枝加栝蒌湯主之傷風頭痛常自汗出而嘔者若汗之必發症大發濕家汗亦作症新產血虛汗出傷風亦作症若其脉沉弦而遲或帶緊或散于指外皆惡候也

發熱無汗惡寒為剛症葛根湯或麻黃葛根湯發熱有汗不惡寒為柔症桂枝加葛根湯桂枝栝蒌葛根湯二症通用小續命湯剛症為陽去附子柔症為陰去麻黃剛症胸滿口噤咬牙脚攣卧不着席大承氣湯下之柔症桂心白朮湯附子防風湯白朮散桂枝煮散選用

風溫濕溫

風溫尺寸俱浮素傷於風因而傷熱風與熱搏即為風溫其外證四肢不收身熱自汗頭疼喘息發渴昏睡或體重不仁慎勿發汗汗之則譫語煩燥目無精彩病在少陰厥陰二經歲時湯人參敗毒散葛根龍胆湯小柴胡湯選用未醒者柴胡桂枝湯

傷寒論大全
發汗已身灼熱知母葛根湯渴甚括蕞根湯脉浮身重汗出漢防已湯誤汗風溫防已黃耆湯

濕溫寸濡而弱尺小而急素傷於濕因而中暑濕與熱搏卽為濕溫其狀胸腹滿目痛壯熱妄言自汗兩脛逆冷攣急惡寒若發其汗使人不能言耳聾不知痛處其身青而色變醫殺之耳

濕溫太陽經用白虎蒼朮湯加桂枝濕勝則一身盡痛發熱身黃小便不利大便反快五苓散加茵陳臟腑虛自利甚理中湯朮附湯

風濕中濕

風濕脉浮先傷濕而後傷風也其證肢體腫痛不能轉側額上微汗惡寒不欲去衣大便難小便利熱至日晡西而劇治法但微解肌若正發汗則風去濕在非徒無益而又害之解肌用麻黃杏子薏苡甘草湯白朮防已黃耆湯不嘔不渴脉浮虛者桂枝附子湯濕多身痛小便自利甘草附子湯煩渴小便不利五苓散外不熱內不渴小便自利朮附湯緩若昏迷腹滿身重自汗失音下利不禁白通湯加白朮去甘草身腫痛微喘惡風杏

仁湯人參敗毒散通用熱而煩渴者加括萋若誤下之小便必不利可五苓散中濕小便不利大便自利甘草附子湯五苓散大小便皆利則與朮附湯身體痛或鼻塞小建中湯加黃耆

溫毒中喝

溫毒者冬月感寒毒異氣至春始發也表證未罷毒氣不散故有發斑之證心下煩悶嘔逆咳嗽後必下利寸脉洪數尺脉實大為病則重以陽氣盛故耳治法通用玄參升麻湯黑膏主之詳見發斑條中

中暑脉虛而伏身熱背惡寒面垢自汗煩燥大渴毛聳惡寒昏昏倦怠而身不痛與傷寒諸證不同矣內外俱熱口燥煩渴四肢微冷而身不痛用白虎湯痰逆惡寒橘皮湯熱悶不惡寒竹葉石膏湯頭痛惡心煩燥心下不快小便不利五苓散下消暑丸中暑用小柴胡湯最良脉亢遲膝理開洒然毛聳口齒燥白虎加人參湯霍亂煩燥大渴腹痛四肢冷脚轉筋以黃連香薷湯

發熱

夫翁翁然而熱者表熱也有蒸蒸而熱者裏熱也其屬表者風寒客於皮膚邪氣怫鬱於外表熱而裏不熱也其屬裏者陽氣下陷入於陰中裏熱甚而達表也其在半表半裏者以表熱未罷邪氣傳裏裏未作實則表裏俱熱而但輕于純在裏也太陽厥陰皆不發熱惟少陰反有發熱之證或其脉沉或下利手足冷為異耳雖然傷寒發熱病之常也脉陰陽俱虛熱不止者汗後復發熱脉燥疾下利者皆不易治其可例視之乎

太陽病發熱頭疼惡寒有汗桂枝湯惡寒無汗麻黃湯

傷寒六七日目中不了了無表裏證大便難身微熱此為實急下之大承氣湯脉浮數者大柴胡湯

陽明病發熱汗出脉浮數實者調胃承氣湯脉浮桂枝湯汗多者胃汁乾急下大承氣湯

中風發熱六七日不解而煩有表裏證渴欲飲水水入即吐名曰水逆五苓散脉浮而大其人發熱煩渴小便赤表裏俱見五苓散
少陽發熱脉弦細而嘔小柴胡湯

少陰反發熱有二病脉沉者麻黃附子細辛湯下利厥逆裏寒外熱脉不出者通脉四逆湯

脉浮熱甚反灸之因火而動必咽燥吐血四逆湯脉浮大遲表熱裏寒下利清穀四逆湯發熱口乾鼻燥能食者黃芩湯

脉浮發熱無汗而渴表未解也小柴胡湯加人參括蕁湯壯熱頭痛心中煩者梔子黃芩湯汗下後有熱大汗則損氣氣損則陽微故脉虛而惡寒大下則傷血血傷則陰弱故脉濇而發熱誤汗誤下皆有此耳且陰以陽為主陽以陰為根下之亡陰矣陰無所主邪氣搏之血虛乃發熱也

太陽病發汗遂發熱惡寒小柴胡湯蒸蒸而熱者屬胃調胃承氣湯

下後陰弱而發熱是為內熱葶藶苦酒湯若脉浮則汗之麻黃湯脉實則下之大柴胡湯大下後身熱不去心中結痛者未欲解梔子豉湯發汗又復下之惡寒發熱無休止時小建中湯

傷寒以圓藥下之身熱不去微煩者梔子乾姜湯

下後身熱不去心中結痛者梔子豉湯瘧後勞復發熱小柴胡湯脉浮者

傷寒論大全 卷三
八
當汗解柴胡桂枝湯脉沉者當下解調胃承氣湯

下利腹反痞滿者生姜瀉心湯小便不利麥門冬湯食復發熱梔子豉湯
加大黃病後虛羸微熱不去者竹葉石膏湯

頭痛

大凡頭痛屬三陽乃邪氣上攻也太陽專主頭痛陽明少陽亦有之三陰
絡上不過頭惟厥陰循喉嚨之後上連目系頂顛故有頭痛乾嘔吐涎沫
之證却無身熱亦與陽證不同雖然風濕在少陰濕溫在太陰其經從足
走至胸中而還及頭痛過於陰毒是又不可拘也若兩感于寒太陽少陰
俱病則頭痛口乾煩滿而渴與夫頭痛極甚又連于胸手足寒者則為真
頭痛不可治矣

太陽病頭痛發熱惡寒無汗麻黃湯有汗桂枝湯已發汗未發汗頭痛如
破者葛根蔥白湯

太陽病下之脉細數者頭痛未止連翹蔥白湯

陽明頭痛不惡寒反惡熱六七日不大便胃實氣攻於上也少與調胃承氣湯